

紀章殊案匯覽



約章成案匯覽乙篇卷三上目錄

章程

交際門 設官類

政務處吏部會奏遵議增改外務部章程摺

光緒二十七年附章程

商部奏謹擬本部章程摺

光緒二十九年附章程

出使美日秘大臣陳咨擬發檀香山商董諭帖文

光緒五年

檀香山商董與檀香山官員酌議允行事宜六條

光緒五年

出使美日秘大臣陳議發檀香山商董章程九條

光緒五年

約章成案匯覽乙篇卷三上

章程

交際門 設官類

政務處吏部會奏遵議增改外務部章程摺

光緒二十七年附章程

奏為遵

旨會議恭摺具陳仰祈

聖鑒事光緒二十七年四月初八日軍機大臣面奉

諭旨奕劻李鴻章奏擬改總理各國事務衙門為外務部一摺所
有應設司員額缺各事宜著政務處大臣會同吏部妥議具奏
欽此竊維總理各國事務衙門改為外務部設立專缺辦理交

涉事務實為因時制宜慎重邦交之要義除總理會辦王大臣左右侍郎由

特旨簡放外其餘一切章程臣等往返函商皆以交涉事宜關係緊要必令該司員等專精練習切實講求俾不至縈情他途分其心力庶幾洞達時務學有專門非獨協一時因應之宜並欲收異日富强之效擬請優予升階厚給養廉仍隨時嚴行甄別勸懲互用以資策勵而育通才擬就章程十二條彼此參酌意見相同本月初九日復欽奉

諭旨所有該部應設司員額缺選補章程並堂司各官應如何優給俸糈之處著政務處大臣會同吏部妥速核議具奏等因欽

此臣等遵即會同詳擬謹將酌議章程另繕清單恭呈

御覽伏候

欽定所有_臣等會議緣由恭摺具陳伏乞

皇太后

皇上聖鑒再此摺係政務處主稿合併聲明謹

奏

謹將議改外務部額缺養廉各項章程恭呈

御覽

一擬分設四司一曰和會司專司各國使臣

覲見會晤請

賞寶星奏

派使臣更換領事文武學堂本部司員升調各項保獎一曰考工
司專司鐵路礦務電線機器製造軍火船政聘用洋將洋員
招工出洋學生一曰推算司專司關稅商務行船華洋借款
財幣郵政本部經費使臣支銷經費一曰庶務司專司界務
防務傳教游歷保護償卹禁令警巡詞訟此外未盡事宜各
以類從

一擬每司設郎中員外郎主事各二員均作為題缺無庸咨
選每司各定額外行走六員以上所設各缺既歸酌補自應
不分滿漢除此次甄別去留外嗣後傳到之員無論郎中員

外郎均先借補主事中書小京官亦准借補主事應扣試俸二年

一擬設左右丞各一員正三品左右參議各一員正四品即充總辦職掌左右丞缺以左右參議開列奏請

簡放左右參議缺先儘郎中次用員外郎由該部堂官保送引見請

旨錄用均備出使大臣之選遇有該部侍郎缺出先儘左右丞開列該部既設有丞參四缺所有郎中例應保送四五品京堂員缺即無庸開列

一擬左右丞參議既備出使之選郎中員外郎主事即可備

參贊領事隨員之選承參奉使毋庸開缺請

旨派員署理郎中以下奏調出洋即應開缺回署作為應補三年
期滿准由出使大臣保獎准保該部升階惟不得保至參議
亦不得保遇有應升之缺開列在前等花樣郎中准保道員
員外郎准保知府主事准保直隸州均分發沿江沿海各省
補用作為專章

一外務部既設專官自應優給養廉以資辦公擬請總理王
公每年給養廉銀一萬二千兩會辦大臣每年各給養廉銀
一萬兩侍郎每年各給養廉銀八千兩左右丞二員每年各
給養廉銀五千兩左右參議二員每年各給養廉銀四千兩

郎中八員每年各給養廉銀三千六百兩員外郎八員每年各給養廉銀三千二百兩主事八員每年各給養廉銀二千四百兩額外二十四員每年各給養廉銀六百兩其繙譯等官薪水由該王大臣從優酌給以上各經費即在本衙門應收三成船鈔及罰款項下開支如有不敷再由出使經費項下撥補

一改設該衙門原期核實振興既將原有之章京分別去留所有新設各缺先儘得力實缺人員改補如不敷改補即作為候補其原衙門底缺即行開去若不願候缺呈請回原衙門者聽其自便此後新缺人員仍隨時察看如不得力仍行

咨回原衙門惟此項人員僅因不諳交涉與別項咨回原衙門者不同咨回後所有該原衙門一切升轉保送各途應准一律辦理以免向隅

一司員保送考試仍照總署舊章辦理惟必須慎選人品端正學識通達並年力富強者方得保送每次考取

記名請以二十員為度遇有額外缺出按次傳補

一新設左右丞參議既充總辦職掌各司掌印擬兼充幫總辦每司設掌印一員幫掌印二員均照六部之例因才酌派不拘坐缺同文館設提調一員以各司幫掌印揀員兼充幫提調二員以七品繙譯官選充

一擬設司務廳司務二員以繙譯官揀補

司務係正八品其以七品揀補者仍

帶原銜

三年期滿准其作為額外主事一體序補

一擬分俄德法英日本五處每處設七品八品九品繙譯官各一缺由同文館學生及各省學堂高等生揀補遇有該部主事缺出歷五缺後准升補七品繙譯官一人其派充同文館幫提調當差扣滿三年即准其升補主事

一該部司員既備出使參隨之選復優予升途厚給養廉自應專意講求以資任用較之各部司員體例不同除京察仍照例辦理外所有保獎關道截取保送及部員應得例差概應停止

一供事仍照總署舊章兩年保獎一次武弁聽差蘇拉各項亦擬照章分別奏咨給予獎敘

商部奏謹擬本部章程摺

光緒二十九年附章程

奏為謹擬

臣部章程繕單恭摺具陳仰祈

聖鑒事光緒二十九年七月十六日奉

上諭現在振興商務應行設立商部衙門應辦一切事宜著該部尚書等妥議具奏等因欽此臣等伏維懋遷作乂商政權輿周之泉府司市漢之平準均輸大抵以因時制宜為設官之本義方今中外互市商務實為利權所繫臣等仰承

恩命

特授專官亟思切實講求勉圖報稱竊以立法尤宜防弊任事要在得人現當創設之初必須明定章程妥籌良法然後可期經久臣等詳加叢議綜其要旨約有數端一曰通下情中國風氣未開官商每多隔膜馴至牽掣抑勒百弊叢生今欲俾隔者而使之通合渙者而使之聚成效實非易觀則各項分司及商律商報館不可不設也一曰定官制我

朝設官分職具有成規近來若外務部分司設缺陞轉不出一途立法盡善亟宜仿行至於商情所在若不予以爵秩之榮誠恐商人中之志切忠誠欲圖效用者仍復裹足不前是宜於慎重之中稍寓變通之義則各司官之與商董不得不分途

並用也一曰立課程各部衙門積弊在一切檔案稿件皆歸吏胥經理遂得上下其手今臣部必使司官親手辦事一人可抵數人之用倘有商人赴署求見不得有絲毫之阻隔推之收發文件批示稟牘亦不容有斯須之逗遛斯課程宜釐定也一曰嚴賞罰商務為利源所在弊竇易乘欲使各司官等砥礪廉隅專心壹志非厚給廉俸不足以激勵清流然獎勵之餘尤須用法使知儆畏庶人人爭自濯磨盡祛招搖牟利之弊斯賞罰宜嚴明也總之當此振興庶務之時務使中外商人咸曉然於

國家設立商部之本意要在保護開通決不與商民爭利必痛

除隔閡因循之習始克盡整齊利導之方臣等竊本斯意擬就章程十二條謹繕清單恭呈

御覽如蒙

俞允應請作為臣部專章即由臣等分別咨行遵照此外如有未盡事宜再由臣等隨時酌覈奏明辦理所有謹擬臣部章程緣由理合恭摺具陳伏乞

皇太后

皇上聖鑒訓示謹

奏

謹將商部開辦章程恭呈

御覽

一擬分設四司一曰保惠司專司商務局所學堂招商一切保護事宜賞給專利文憑譯書譯報聘請洋工程師及臣部司員陞調補缺各項保獎一曰平均司專司開墾農務蠶桑山利水利樹藝畜牧一切生植之事一曰通藝司專司工藝機器製造鐵路街道行輪設電勘採礦務聘請礦師招工諸事一曰會計司專司稅務銀行貨幣各業賽會禁令會審詞訟考取律師校正權度量衡以及臣部報銷經費此外設司務廳一所專司收發文件繕譯電報其餘未盡事宜各以類從至以上四司所立各項名目必須詳備惟創設之初有應